

Txirritola

ARAMAIO / Barikua / 2004ko martxoaren 26a / 102. zenbakia

KOORDINATZAILEA: Ubane Madera • Otolara Lizentziaduna 31 20500 ARRASATE • Tel.: 943 71 25 11 • Faxa: 943 71 23 89 • Posta elektronikoa: txirritola@goiena.com • Lege gordailua: SS.1084/02

Bizente Goikoetxea musikariaren urteurrena ospatzeko ekitaldiak

UBANE MADERA

Aurten, Bizente Goikoetxea aramaioarra jaio zela 150 urte beteko dira. Horren data esanguratsua ospatzeko, ekimenak antolatzen dabilta herrian. Mertxe Mondragon alkateak jakinarazi digu, besteak beste, apirilaren 25ean kontzertua izango dela Gasteizen.

Aramaioko seme kutun Bizente Goikoetxea jaio zela 150 urte beteko dira aurten. Hain zuzen ere, 1854ko apirilaren 4an jaio zen, Ibarako Morron edo Portua izeneko etxean. Hala, herriko musikari garrantzitsu horren urteurrena ospatzeko asmoa dute herrian. Dagoeneko ezarri dute data bat: apirilaren 25a. Eta kontzertuak egiteko hiru abesbatzaren parte hartzea lortzeko ahaleginetan dabilta. Batetik, eta Bizente Goikoetxeak Valladolidekin izan zuen lotura dela-eta, hango unibertsitateko abesbatzarekin harremanetan ibili dira, apirilaren amaieran hona etor daitez. Bestetik, Gasteizko Araba abesbatzarekin ere egin dute berba. Asmoa da bi abesbatza horiek kontzertua egitea, Bizente Goikoetxeak egindako lanean oinarrituta. Hori Gasteizen izango



AYER Y HOY DEL VALLE DE ARAMAIONA

Erljioarekin lotutako musika landu zuen Bizente Goikoetxeak.

da. Baina, jakina, Aramaion ere egingo dute ospakizun ekitaldia.

MEZA ETA KONZERTUA

Hala, zehaztasun guztiak lotuta ez badaude ere, Mertxe Mondragonek azaldu digu asmoa dela meza berezia egitea Aramaion. Besteak beste, Sabin Salaberriak parte hartuko du, baita Bizente Goikoetxea abesbatzak ere. Eta mezaren ostean, kontzertua anto-

latu gura dute, Valladolideko eta Gasteizko abesbatzekin. Era berean, gaur egun elizpean dagoen Bizente Goikoetxearen omenezko plakaren ondoan berri bat ipini gura dute.

Hori guztia antolatzen laguntzen Foru Aldundia, Vital Kutxa eta Aramaio Udal dabilzala jakinarazi digute; baita Jose Maria Oizartabal eta Aramaio abesbatza ere.

Aurrekontuak eta zenbait mozio osoko bilkuran

U.M.

Atzo, eguena, osoko bilkura egin zuen udalbatzarrak. Landu beharreko gaien artean, besteak beste, aurtengo aurrekontuak, bi mozio eta alegazio bat izan zituen aztergai udalbatzarrak.

Ezohiko egunean baina ohiko ordutegian egin zuen udalbatzarrak martxoari dagokion bilera. Gainera, mahai gainean gai inportanteak izan zituzten lantzeko. Tartean, aurtengo aurrekontuak. Edozelan ere, albiste hau idaztean batzarra egin barik zegoenez, xehetasun gutxi eman genezake oraingoz. Kontuak kontu, aurre-

ratu digutenez, aurrekontuekin batera, udal ordenantzen zerga-tasa eta herri prezioen aldaketari hAMALauk egindako alegazioa ere aztertzeke zuen udalbatzarrak. Baita, Tolosaldeko Marnu Azkarate preso politikoaekin lotutako pare bat mozio ere.

Mozioetako bat hAMALau taldeak aurkeztu zuen. Oro har, preso gaixo dagoela-eta, haren askatasuna exijitzen dute, eta besteak beste, hainbat alderdik eta komunikabidek duten jarrera salatu gura dute. Beste mozioa, berriz, Udalak aurkeztu zuen. Hark ere presoaren askatasuna exijitu zuen eta besteak beste, Espainiako Gobernuak erabiltzen duen espertxe-politika salatu zuen.

LABUR

Elbarriendako laguntzak eskatzeko aukera, Gizarte Ongizaterako Erakundearen eskutik

Elbarriendako laguntzak eskatzeko deialdi publikoa egin du ongizaterako foru erakundeak. Honako laguntzak ematen dituzte: pertsonak euren kabuz moldatzeko; etxeko laguntza teknikoa (zaintza eta garbiketa pertsonalerako); etxeko lanak egiteko; ingurukoekin harremanak sustatzeko (komunikaziorako eta informaziorako); joste-etorriak egiteko gaitasuna areagotzeko; laguntza espezializatua; lanbide sustapena eta bestelako laguntza bereziak eta osagarriak. Apirilaren 29a baino lehen egin behar dira eskaerak.

Andere Arriolabengoa bihar Aramaion, bertsolari txapelketan

Bihar, zapatua, hitzordua dute bertsolariak eta bertsozaleek herriko kultura etxean. Arabako II. Bertsolari Txapelketaren barruan, aurreneko finalerdia jokatu dute-eta. Iluntzean, 19:00etan hasiko da lehiaketa. Eta, saio horretan bi aramaioarrek parte hartuko dute: batetik, Lierni Altunak, finalerdia aurkezten. Eta, bestetik, Andere Arriolabengoa, gainerako bertsolariarekin lehiatzen. Izan ere, finaldirako bigarren postuan sailkatu zen Aguraingo kanporaketa saioan. Hain zuzen, irabazlearengandik (Alberto Martinez

Beitto) puntu bakarrera geratu zen aramaioarra.

Aipatutako bi bertsolari horiekin batera, honako bost bertsolariak parte hartuko dute bihar: Zigor Enbeitak, Asier Otamendik, Ruben Sanchezek, Orlando Arreitunaindiak eta Ricardo Gonzalez de Duranak.

EGIN BEHARREKO LANA

Andere Arriolabengoa kontatu digunez, honako lana egin behar dute bihar: besteak beste, ofiziala zortziko txikian, ofiziala zortziko handian, ofiziala hamarrekotako txikian eta gero,

bakarkakoa, kartzelako lana, hain zuzen ere.

BIGARREN FINALERDIA

Hala, Aramaion puntu gehien lortzen duena sailkatuko da Gasteizko finalerako. Baina, ez da bakarra izango, beste finalerdi bat ere jokatu dute-eta. Apirilaren 3an izango da, Laudioko Lanbide Heziketako Udal Eskolan (Aiarra). Han, Manex Agirrek jardungo du. Honako bost bertsolarien kontra egin behar du: Alberto Martinez Beitto, Serapio Lopez, Juan Mari Juaristi, Iñaki Viñaspere eta Oihane Perea.



ANDER FERNANDEZ DE BERTSO

19:00etan hasiko da finalerdia, tartean Andere Arriolabengoa lehiatuko da.

TELEFONO JAKINGARRIAK

OSASUNA / LARRIALDIAK

Osasun etxea (txandak)	945 44 53 40
Botika	945 44 50 03
Udaletxea	945 44 50 16
Ertzaintza (Arrasate)	943 79 71 99
Gurutze Gorria (Legutio)	945 45 52 52
San Martin Eskola	945 44 50 04
Taxia eta autobusak	945 44 50 33
Udal kiroldegia	945 44 53 35
Postetxea	945 44 50 83
Zuiaiko Eskualdea	945 43 01 67
Suhiltzaileak (Zubillaga)	943 78 28 00

AUTOBUSORDUTEGIA

ARRASATE	ARAMAIO	GASTEIZ
07:00	07:15	08:00
10:00*	10:15	
11:00	11:15	
12:00*	12:15*	13:00
15:15	15:30	16:15
17:20	17:35	
18:30*	18:45	
20:30	20:45	21:25
21:00*	21:15	

GASTEIZ	ARAMAIO	ARRASATE
	07:50	08:05
08:15	09:00	09:15
	10:15*	10:30
	11:15	11:30
13:10	13:55	14:10
16:20	17:05	17:20
	17:35	17:50
	18:45*	19:00
19:30	20:00	20:15

OHARRA: izartxoaren duten orduetan eskaeraren arabera zerbitzua eskaintzen dute. Auzoetako bizilagunei zuzendutakoa da, eta autobusa erabili gura badute, bezperan deitu beharko dute honako zenbaki honetara: 629 54 59 23

OHARRAK

BAÑERAKOEN EMAITZAK

Joan den asteburua berezia zen arren, Bañera Kirol Elkarteko neska-mutikoez partiduak jokatu zituzten zapatuan. Eta, gainera, mutilen taldeak emaitza polita ekarri zuen etxera: 0-11 irabazi zion Diocesanas Cano taldeari. Bañerako ordezkariek esan digutenez, aurkari erraza izan zuten eta horregatik lortu zuten horren emaitza ikusgarria. Neskei dagokienez, berriz, Olabide taldearen kontra jokatu zuten eta launako berdinketa lortu zuten. Bi taldeek oso parekatuta jokatu zuten esan digute, eta aramaiorak aurretik ibili ziren arren, zoritxarrez, azken unean berdinketaren gola egin zuten. Oraingo asteburuari begira, bihar, neskek 10:00etan dute hitzordua, Aramaion. Lan eta Jolas taldea izango dute aurkari. Eta mutilek, goizeko hamaiketan, Canciller Ayala taldea hartuko dute.

BARIKUKO ZINEMA

Oraingo honetan, D. Lean zuzendariaren *El puente sobre el río Kwai* filma emango dute.

Maider Unda ez da izango Greziako Olinpiadetan

UBANE MADERA

Maider Unda borrokariak ez du lortu Greziako Olinpiar Jokoetarako sailkatzea. Asteburuan jokatu du kanporaketa. Orain Aramaion da, Oletan, eta hantxe geratuko da, aurrera begira zer egin erabaki arte. Izan ere, borrokan segitu nahi duen arren, ez du Madrilerantz itzuli nahi.

Oraingo asteburuan jokatu du Maider Undak Greziako Olinpiar Jokoetarako sailkatzeko proba, Madrilen. Zozketa egin, eta Holandako, Hungariako eta Mongoliako aurkariak tokatu zitzaizkion.

Kontatu digunez, Holandaren kontra jokatu zuen lehenengo eta irabazi egin zuen; Hungariako ordezkariekin borrokatu zen gero, eta hari ere irabazi egin zion. Baina Mongoliakoaren kontra galdu egin zuen, azkeneko minutuan, gainera. "Gainera, ez zegoen maila alturik borrokalarien artean, hori da txarrena". Zorte txarra izan zuen, bada, Maider Undak asteburuko saioan. Esan digu hasieran pena handia eman ziola, batez ere Olinpiar Jokoe-

tan parte hartzeko aukera izan duelako. Dena dela, aurrera egingo duela ere esan digu.

Hori bai, sailkatu ez izan horrek erabat aldatu dio etorkizuna Oletako borrokalariari. Izan ere, ADO beka abenduan bukatu zitzaion, eta hura berriro eskuratzeko Olinpiar Jokoetarako behar zuen sailkatu. Horren ondorioz, aurten ezin izan du ADO bekarik lortu.

MADRILEN GUSTURA EZ

Edozelan ere, jakinarazi digu Madrilen ez zegoela gustura. Eta borrokarekin segitzeko gogo duen arren, ez duela Madrilen bizi nahi. Hala, oraindik ez daki zer egingo duen etorkizunean. Hemen, betiko entrenatzailearekin segitzeko aukera duela esan digu, Luis Crespo gasteiztarrekin. Eta datorren urteari begira ez duela aspertzeko astirik izango, besteak beste, Mediterraneoko Jokoak, Europako Txapelketa eta Munduko Txapelketa izango direlako. Edozelan ere, oraingoz atsedean hartuko du eta ez dauka bestelako txapelketan-eta pentsatzeko eta parte hartzeko gogorik.



Zuhaitz gehiago Kurtzetan

Joan den bariku goizean, Kurtzetan 50 umek bat egin zuten aurtengo Zuhaitz Eguna ospatzeko asmoarekin. Aitzurra hartu eta hantxe ibili ziren esandakoak adi-adin entzun eta zuhaitz adaxka gazteak landatzen.

Eskolako gaztetxoak, berriz, herrian zehar ibili ziren Joxe Oruna herriko lorezainaren gidaritzapean landareen eta zuhaitzen berri ikasten. //JULEN IRIONDO

BOTEPRONTOAN/ Andere Arriolabengoa · Bertsolaria

"Gizonen monopolioa bukatu egin da; neskak hasi gara, apurka eta kostata, baina hasi gara"

Aramaioko bertsolarien artean, bada neska bat urteak adaramatzala plazetan bertotan. Aurten, gainera, Arabako Bertsolari Txapelketako finalerdietako batera iristea lortu du, oraingoz. Andere Arriolabengoa da bera, Zuzenbide Publikoko ikasle gaztea:

Zelatan Zuzenbide Publikoko ikasle bat bertsolari?

Bertsotan karreran baino lehenago hasi nintzen.

Zela izan zen hori?

Behin Manex etorri zen esaten hasi behar zela bertso eskola Aramaion. Hark konbentzitu gintuen joateko. Harrezkero sei urte pasatu dira.

Eta, etxera joan eta bertsolari izan nahi zenuela esatean...

Nik uste dut ez nuela hala esan. Bertso eskolan hasi behar nintzela esan nien, eta etxean gustura. Aitari-eta beti gustatu izan zaizkie euskal abestiak eta kantu zaharrak... Gustura hartu zuten ikustea behintzat alabak zaletasuna bazeukala. **Azkenaldian geroago eta neska gehiago ikusten da bertsotan. Badago horren arrazoirik?** Bertsolaritzaren historian zehar erreferentzia guztiak gizonenak izan dira. Eta orain urte gutxi hasi ziren neskak, eta



orain, haien erreferentzia ere badugu: Oihane Enbeita, Maialen Lujanbio... Nik uste dut gizonen monopolioa bukatu egin dela. Neskak hasi gara, apurka-apurka, kostata, baina hasi gara.

Orain igartzen duzue desberdintasunik neskak zaretelako?

Kopuru aldetik mutilak askoz ere gehiago dira. Dena dela, uste dut jendea hasi dela aurreiritziak kentzen eta berdin-berdin deitzen diotela neska bati edo mutil bati bertso saio baterako. Ez dut uste gaur egun hori arazoa denik.

Arabako txapelketako finalerdia jokatu duzu bihar, zela aurreikusten duzu saioa?

Zaila izango da. Konpetentzia handia izango da, gainera Aramaion da eta niretako horrek presio estra-edo badauka. Baina, kanporaketak ondo joan ziren, eta espero dut

finalerdian egindako saioarekin gustura gelditzea eta hori egiteko kapaz banaizela uste dut. Ea nerbioak ez diren oso handiak izaten...

Horren harira, zela preparamen duzu halako saio bat?

Esperientziak egiten du asko. Zenbat eta jendaurreko saio gehiago hobeko; nahiz eta txapelketetan beste ardura bat eta beste nerbio mota batzuk izan. Pasatutakoak balio izaten du. Eta saiatzen naiz txapelketaren unera arte entrenituta egoten.

Zuk esperientzia handia duzu?

Kontua da orain arte bertsolari gazteek txapelketetan ibili behar genuela ezagunak izateko eta gero, bestelako saioetara deitzeko. Berriz, aurten, Bizkaian iaz hasi ziren moduan, bertsolari gazteak tabernetan-eta kantuan hasi gara; hilean pare bat saio-edo ziurtatuta ditugu. Gazteok antolatzen dugu guztia, eta ez dugu kobratzen.

Zuk zein ikusten duzu txapelketako irabazle?

Gurako nuke Oihane Perea izatea, neska delako eta beti atarian geratu izan delako... Bestela, Manex. Gaztea da eta beste freskotasan eta bizitasun bat ematen du...Gainera Manex koadrilakoa da, eta lehengusua... (Barre).

"Birritan izan naiz eskola arteko txapelketetan; 18 urterekin hasi nintzen Arabakoan"

"Tabernetako saioa bukatu ostean jendea datorrenean esaten gustura egon dela, oso pozgarria da"